

खबरां

- असम, केरलम ते केंद्र शासित प्रदेश पुदुचेरी च विधानसभा चुनांS लेई मतदान शांतिपूर्ण तरीके कन्नै सम्पन्न।
- प्रधानमंत्री नरेंद्र मोदी होरें आखेआ ऐ जे भारती लोकतंत्र गी होर मजबूत बनाने लेई विधानमंडल च महिलाएं लेई आरक्षण समें दी मंग ऐ।
- 15 ज्हार 400 टन एलपीजी लेइयै आवा'रदा भारती झंडे आह्ला ज्हाज मुम्बई दे ज्वाहर लाल नेहरू बंदरगाह प्राधिकरण च पुजजी गेआ।
- विदेश सचिव विक्रम मिस्त्री होरें अधिग्रहण ते रख-रखाव लेई अमरीका दे रक्षा उप सचिव माइकल पी. डफी होरें गी भारत ते अमरीकी रक्षा सांझेदारी गी अगगे बधाने लेई आखेआ।
- मंगोलिया च एशियन बाँक्सिंग चैंपियनशिप च भारती महिला मुक्केबाजें सुन्ने दे त्रै तगमे जित्तियै अपना दबदबा कायम कीता ऐ।
- बैडमिंटन एशिया चैंपियनशिप च आयुष शेटी नै मर्दे दे सिंगल्स क्वार्टर फाइनल च थाह पक्की करी लैती ऐ।

<><><><><><>

Assembly-Polling

असम, केरलम ते केंद्र शासित प्रदेश पुदुचेरी च अज्ज विधानसभाएं लेई मतदान कीता गेआ। असम दी सबनें 126 सीटें लेई केरल च 140 सीटें लेई पुदुचेरी च 30 सीटें लेई इक्के चरण च मतदान कीता गेआ। चुनांS आयोग नै निष्पक्ष ते शांतिपूर्ण मतदान गी यकीनी बनाने लेई सारे पुख्ता प्रबंध कीते दे हे। उआं पच्छिम बंगाल च पैहले चरण दे मतदान लेई नामांकन वापस लैने दा अज्ज अखीरी ध्याडा हा ते पच्छिम बंगाल च दुए चरण दे मतदान लेई नामांकन दाखल करने दा बी अज्ज खीरी दिन हा। चौनें राज्यें ते केंद्र शासित प्रदेशें लेई वोटें दी गिनतरी अगले म्हीने दी 4 तरीक गी होग।

<><><><><><>

In-Nomination Withdrawl

तमिलनाडू च नामांकन वापस लैने दी अज्ज खीरी तरीक ही। चुनावी मैदान च शामिल प्रतियोगियें दी खीरी सूची अज्ज संझा दे बाद जारी कीती जाह्ग। मौजूदा स्थिति मताबक कुल 5 ज्हार 24 नामांकन स्वीकार कीते गे ना। इस बारी एह चुनावी मकाबला त्रिकोणी होग जेह्दे च ए.आई.ए.डी.एम.के दी अगुवाई आहली एनडीए-डीएमके दी अगुवाई आहली सेक्युलर प्रोग्रेसिव एलायंस ते एक्टर विजय दी अगुवाई आहली तमिलना वेत्रीकझागम राज्य दे सबनें 234 विधानसभा क्षेत्रें च चुनां लडग।

<><><><><><>

PM-Women Reservation

प्रधानमंत्री नरेंद्र मोदी होरें आखेआ ऐ जे भारती लोकतंत्र गी मजबूत बनाने लेई विधानमंडल च महिलाएं लेई आरक्षण समें दी मंग ऐ। इक ओपर एडिटोरियल च अपने बचार सांझे करदे होई श्री

मोदी हों आखेआ जे इस आरक्षण गी आहने च चिर लाना बडा गलत होगा। इक वीडियो गी सांझा करदे होई प्रधानमंत्री हों आखेआ जे महिला आरक्षण गी अगे बधाने आहले इक महत्वपूर्ण बिल उप्पर चर्चा ते पारित करने लेई इस म्हीने दी 16 तरीक गी संसद सद्दी दी ऐ। प्रधानमंत्री मोदी हों आखेआ जे एह जरूरी ऐ जे 2029 दे लोकसभा चुनां दे औने आहले समें च बक्ख-बक्ख राज्यें च विधानसभा चुनां गी महिला आरक्षण दे तौरा पर कीता जा। महिलाएं दे जोगदान गी उजागर करदे होई प्रधानमंत्री हों आखेआ जे विज्ञान ते तनीक थमां लेइयै उद्यमिता तगर खेइएँ थमां लेइयै सशस्त्र बल तगर ते संगीत थमां लेइयै कला तगर हर क्षेत्र च देश दी तरक्की च महिलां अगे न। उनें आखेआ जे जदूं महिलाएं प्रशासन ते फैसले लैने च हिसस लैंदियां न तां ओह अपने कन्नै ऐसे अनुभव ते दृष्टि लेई ओंदियां न जेहडे देश गी समृद्ध करदे न।

<><><><><><>

Women-Reservation

केंद्र सरकारै लोकसभा ते राज्यें दिएं विधानसभाएं च महिलाएं लेई 33 फीसदी आरक्षण यकीनी बनाने लेई महिला आरक्षण बिल गी मजबूती देने दे मकसद कन्नै ओंदी 16 थमां 18 अप्रैल धोड़ी 3 दिनें दे इक बशेष संसदी इजलास दी तजवीज कीती दी ऐ। मेद ऐ जे एहदी अमलावरी 2029 आले चुनां दे कोल-कश होई जाहगा। एह पैहलकदमी लोकतंत्र च महिलाएं दी मती भागीदारी ते महिलाएं दी अगुवाई आले शासन दी दिशा च कीते जा'रदे जत्तें गी दर्शादी ऐ।

<><><><><><>

LPG-Vessel

एलपीजी गी लेईये आवा'रदा भारती झंडे आहला ज्हाज ग्रीन एशिया अज्ज मुम्बई पुजेआ ते जवाहर लाल नेहरू बंदरगाह प्राधिकरण दे लिक्विड टर्मिनल च लगगी गेआ। इस ज्हाज नै 15 ज्हार 400 टन एलपीजी लेइये स्ट्रेट ऑफ होमुर्ज पार कीता। ईरान, अमरीका ते इजराइल बश्कार टकराव शुरू होने दे बाद जे.एन.पी.ए तगर पुज्जने आहला एह पैहला ज्हाज ऐ। ज्हाज दे सबनें चालक दल दे सदस्य सुरक्षित न ते कन्नै माल दे बी सुरक्षित होने दी जानकारी दिती गई ऐ।

<><><><><><>

Foreign Secy Washington

बदेश सचिव विक्रम मिसरी हों अज्ज अमरीका दे वाशिंगटन च अधिग्रहण ते रक्ख-रखा दे लेई अमरीका दे रक्षा उप सचिव माइकल पी.डफी हुं'दे कन्नै मलाटी कीती। बदेश मंत्रालय दे प्रवक्ता रणधीर जायसवाल हों सोशल मीडिया पोस्ट च दस्सेआ जे बैठक दा मकसद भारत ते अमरीका दी प्रमुख रक्षा सांझ-भ्याली गी अगे बधाना ऐ। एहदे च सैह-उत्पादन, रक्ख-रखा दे हिंद-प्रशांत खेत्तर च सांझी प्राथमिकताएं बक्खी ध्यान केंद्रित कीता गेआ। मिसरी हों उद्योग ते सुरक्षा ब्यूरो दे अमरीकी उप-सचिव जेफरी केसलर ते अंतर्राष्ट्री बपार दे अमरीका दे उप सचिव विलियम किम्मिट कन्नै बी मलाटी कीती। श्री जायसवाल हों दस्सेआ जे चर्चा च दपक्खी बपार ते रणनीतिक ते उभरदी तकनीकें च निवेश गी बढावा देने ते उभरदे निर्यात नियंत्रण ढांचें पर बचारें दा आदान-प्रदान करने पर बल दिता गेआ।

<><><><><><>

PM Farmer Welfare

भाजपा दे वरिष्ठ नेता ते प्रधानमंत्री नरेंद्र मोदी होरें अज्ज आखेआ जे जिसलै बीजेपी पच्छिम बंगाल च सरकार बनाग तां उसलै करसानें ते मच्छेरें दी भलाई ते दिक्खभाल दा ध्यान रक्खेआ जाह्ग। पच्छिम बंगाल दे हल्दियां च इक जनसभा गी संबोधित करदे होई श्री मोदी होरें आखेआ जेकर विधानसभा चुनावं दे बाद बीजेपी नैराज्य च सरकार बनाई लैती तां करसानें गी पक्का फैयदा थहोग। दुई बक्खी टीएमसी सुप्रीमो ममता बनर्जी होरें अज्ज उत्तरी 24 परगना जिले दे मिनाखान च इक रैली च शामिल होइयां। उनें उत्तरी 24 परगना जिले दे होरनें थाहें पर बी जनसभां कीतियां।

<><><><><><>

India-Swedan

भारत ते स्वीडन बश्कार विदेश कार्यालय परामर्श दी 8मीं बैठक अज्ज नमीं दिल्ली च होई। इसबैठक दी सहअध्यक्षता विदेश मंत्रालय च पच्छिम मामलें दे सचिव सिबी जार्ज ते स्वीडन दे विदेश मामलें दे मंत्री डैग हार्टेलियस नै मिलियै कीती। बैठक च दौनें देशें अपने सरबंधें दी समीक्षा कीती ते राजनीति, बपार, निवेश, रक्षा, नवाचार ते लोकें दे बश्कार संपर्क जियां क्षेत्रें च सहयोग बधाने पर सहमति जताई।

<><><><><><>

Trishakti-Corps

सेना दी त्रिशक्ति कोर ने उत्तरी सिक्किम दे लाचेन च फसे दे सैलानिएं गी सुरक्षित बचाई कडुने लेई हिम सेतु अभियान रम्भेआ ऐ। ल्हास-पस्सियां पौने करी उत्तरी सिक्किम च लाचेन ते चुंगथांग मझाटै सिङ्क संपर्क त्रुट्टी गेआ हा जेह्दे'नै इलाके च आओजाई प्रभावत होई। खराब मौसम ते भारी बर्फबारी दे बावजूद, सैनिकें महत्वपूर्ण दरें गी खोली दित्ता ऐ ते लोकें गी कडुने दे कम्मै ताई मुतवातल रस्तें गी बी खोली दित्ता गेआ ऐ। सीमा सङ्क संगठन त्रिशक्ति कोर दे सैनिकें दे कन्नै नेडमा तालमेल करा'रदा ऐ ते चुनौतिएं-भरोचे मौसम ते करठन इलाके आहले हालात दे बावजूद लगातार सिङ्कै दी सफाई, बर्फ हटाने ते संपर्क ब्हाल करने दा कम्म करा'रदा ऐ।

<><><><><><>

Pak False Propaganda

केन्द्र सरकारै पाकिस्तानी वेबसाइटें आसेआ फैलाई जा'रदी ओकड़ी खबर गी सिरे थमां नकारी दित्ता ऐ जेह्दे च एह दावा बन्नेआ गेआ ऐ जे गुजरात च स्थित भारती वायु सेना दे नालिया एयरबेस ने ईरान दे चाबहार बंदरगाह पर होए दे इस्राएली हमले च इस्राएल दे लडाकू ज्हाजें गी ईंधन भरने ते साज-समेयान मतल्लक मदाद उपलब्ध करोआई ही। पीआईबी दी तत्थें दी जांच सरबन्धी इकाई ने आखेआ ऐ जे एह दावा फर्जी ऐ। ईकाई ने दस्सेआ ऐ जे एह प्रचार जानी-बूझियै फैलाए जा'रदे प्रोपेगेंडे दा हिस्सा ऐ। ईकाई ने नागरिकें गी फर्जी खबरें गी अगगे सांझा नेई करने दी बी गुजारश कीती ऐ।

<><><><><><>

CM-Appointment

मुख्यमंत्री उमर अब्दुल्ला होंरें कश्मीर खित्ते दे 90 मेदवारें गी अज्ज SRO-43/ RAS तैह्त्त नियुक्ति पत्तर सौंपे। इस्सै चाल्ली दा इक समारोह इस हफ्ते जम्मू च बी आयोजित कीता गेआ हा। इस मौके पर बोलदे होई मुख्यमंत्री होंरें जिम्मेदारी निभांदे होई पूरे होई गेदे मलाजमें दे परोआरें गी मदाद उपलब्ध करोआने दी अपनी बचनबद्धता गी फही पक्का कीता। मुख्यमंत्री होंरें आखेआ जे इ'नें नियुक्तिएं दा मकसद प्रभावित परोआरें गी औक्खी घड़ी दरान स्थिरता ते विश्वास उपलब्ध करोआना ऐ। उमर होंरें नमें भर्ती लोकें गी गुजारश कीती जे ओहू पूरे होई गेदे अपने परोआर दे सदस्यें दी सेवाभाव आहली परम्परा गी अगगे बधांदे होई पूरी निश्ठा ते दया-भावना कन्नैअपनी जिम्मेदारिएं गी अंजाम देन।

<><><><><><>

NHW

जम्मू-श्रीनगरर राश्ट्री जरनैली शिडक पर गड्डिएं दी आवाजाई अज्ज बहाल होई गई ऐ। रामबन जिले च शिडक पर ल्हास-पस्सियां पौने करी एहू जरनैली शिडक पिछले दो दिनें थमां बंद होई गेदी ही। आकाशवाणी जम्मू संवादाता दी रिपोर्ट मूजब घाटी गी शिडक रस्ते राएं जोड़ने आहली इकमात्र शिडक सोमवारें थमां केई सारी थाहें पस्सियां पौने करी बंद ही। हालांकि मंगलवार बड्डुलै शिडक किश घंटे लेई खुल्ली ही, पर मंगलवारें दपैहरी मगरा दो थाहें पर ल्हास-पस्सियां पौने करी एहू शिडक फही बंद होई गई। शिडक खुलने मगरा केई सारी थाहें पर फसी दिएं गड्डिएं गी कड्डुआ गेआ।

<><><><><><>

Counter-Terror

जम्मू-कश्मीर पुलस दे इतिहास च पैहली बारी दलेर कर्मिएं गी तरक्की दित्ती गई। नकद ईनाम दित्ते गए ते केई एसपीओ गी बतौर कान्स्टेबल लाया गेआ ऐ। एहू गैंड जम्मू जोन च आतंकवाद रोधी कारवाइएं च बेहरीन, टकोहदी ते बे-मिसाल भूमिका निभाने आहले कर्मिएं आस्तै पुट्टी गई ऐ। 2021 थमां 2023 बश्कार खित्ते च आतंकवादी गतिविधिएं च खासा बाद्दा दर्ज कीता गेआ, खास करी प्हाड़ी इलाकें च। इनें चुनौतिएं कन्नै निब्बड़ने लेई डीजीपी नलिन प्रभात होंरें दूर-दरेडे ते प्हाड़ी इलाकें च आरजी ठकाने बनाने दा फैसला कीता। विशेष कार्रवाई समूह गी माहिराना सिखलाई बी दित्ती गई जेदे च गुरेल्ला, जंगल ते प्हाड़ी इलाकें च रौहना, छप्पना ते कुसै आपरेशन दरान कार्रवाई करना शामिल ऐ।

<><><><><><>

Badminton

एशियाई बैडमिंटन चैंपियनशिप च, आयुष शेट्टी ने ची यू जेन गी सिद्धे सैटें च 21-16, 21-12 कन्नै हराइयै मर्दे दे सिंगल्सग दे क्वार्टर फाइनल च थाह पक्की करी लैती ऐ। हालांकि, एच.एस. प्रणॉय चीन दे वेंग हांग यांग थमां 12-21, 19-21 कन्नै हारियै टूर्नामेंट शा बाहर होई गे ना। तोआई, महिला सिंगल्स च, द'उं बारी दी ओलंपिक पदक विजेता पी.वी. सिंधु चीन दी दुए नम्बरै दी खड्डारन वांग

झीयी थमां 16-21, 15-21 कन्नै हारी गेईयां। मिक्कुम डबलस च ध्रुव कपिला ते तनीशा क्रास्टो गी
बी मलेशिया दे चेन तांग जी ते तोह ई वेई थमां 13-21, 14-21 कन्नै हार दा सामना करना पेआ।

<><><><><><>